

Alþingi  
Erindi nr. P 128/1777  
komudagur 30.7.2003

LÖGRÉTTA,  
FÉLAG LAGANEMA VIÐ HÁSKÓLANN Í REYKJAVÍK

apríl 24, 2003

Nefndasvið Alþingis, Austurstræti 8-10, 150 Reykjavík.

Háttvirta Allsherjarnefnd.

Lögrétta, félag laganema við Háskólann í Reykjavík, hefur tekið til umfjöllunar frumvarp til laga um breytingu á lögum um lögmenn, nr. 77 15. júní 1998 (lagt fyrir Alþingi á 128. löggjafarþingi 2002-2003).

*Athugasemdir við lagafrumvarp þetta.*

Frumvarp þetta er lagt fram sökum þess að verið er að setja inn í íslenska löggjöf tilskipun EES-nefndarinnar um breytingu á VII. viðauka EES-samningsins um að fella inn í hann tilskipun Evrópuþingsins og ráðsins nr. 98/5 frá 16. febrúar 1998. Þessi breyting hefur í för með sér að verið er að auðvelda lögmönnum innan EES-svæðisins að starfa í öðru aðildarríki en því ríki sem þeir öðlast réttindi sín innan.

Aðrar breytingar sem þetta frumvarp tekur til eru um þau skilyrði sem þarf að uppfylla til að gegna embætti héraðsdómslögmanns. Núgildandi lög segja að embættispróf í lögfræði þurfi frá Háskóla Íslands. Frumvarp þetta gerir þá breytingu að nóg sé að hafa lokið prófi í lögfræði frá lagadeild háskóla sem viðurkenndur er hér á landi skv. lögum um háskóla.

Lögrétta telur rétt að benda á þá óeðlilegu stöðu sem lagadeild Háskóla Íslands nýtur. samkvæmt 7. grein laga nr. 77/1998 um lögmenn. Væri æskilegt að nefndin taki þá grein til skoðunar í starfi sínu og geri breytingar sem koma í veg fyrir óeðlileg afskipti lagadeildar Háskóla Íslands af framkvæmd prófraunar umfram aðrar lagadeildir í landinu. Ekki kemur annað til greina en að lagadeildir komi að framkvæmd prófraunar. Við leggjum til að allar lagadeildir eigi möguleika á sæti í prófnefndinni.

*Athugasemdir við einstakar greinar frumvarpsins.*

Um 1. gr.

Engin athugasemd við grein þessa.

Um 2. gr.

Engin athugasemd við grein þessa.

Um 3. gr.

Engin athugasemd við grein þessa.

Um 4. gr.

Breyting þessi hefur orðið valdur að deilum um inntak laganáms á Íslandi. Sú deila hefur varðað kröfur sem gera þarf til kennslu lögfræðinnar sem fræðigreinar. Andstæðingar þessa frumvarps til breytinga á lögum um lögmenn hafa talið að ekki sé nógu ítarlega tekið fram hvað kenna skuli. Í athugasemdum um 4. gr. þessa frumvarps er tekið fram hvaða grunngreinar kenna skuli meðal annars í grunnnámi laganáms á Íslandi. Óeðlilegt er að binda í lög nánar inntak laganáms á Íslandi því eðlilegt er að lagadeildir hvers skóla njóti ákveðins frelsis til kennslu. Samanburður við hin Norðurlöndin sýnir fram á að þar eru hvergi gerðar þær kröfur að lagakennsla skuli vera sniðin í sama formið. Hvernig má þá réttlæta það að lögmenn innan EES-svæðisins geti komið hingað til lands og starfað án þess að hafa stundað lögfræðináms sem samræmist kröfum Íslendinga?


April 24, 2003

Menntamálaráðuneytinu er heimilt að setja í reglugerð kröfur eða nánari útlistanir hvað kenna skuli við einstaka kennslugreinar, skv. lögum um háskóla. Lögrétta telur með öllu ómögulegt að binda í lög grunnkröfur til laganáms. Andstæðingum frumvarps þessa hefur ekki tekist að benda á neinar raunhæfar leiðir til að fara í þeim efnum. Það er engin trygging fyrir gæðum kennslu að kenna sem flesta tíma. Inntak tímanna er það sem öllu máli skiptir. Núverandi eftirlit með skólum fer fram hjá menntamálaráðuneytinu og telur Lögrétta að svo skuli áfram vera, enda því ráðuneyti best treystandi til að hafa umsjón með menntamálum á Íslandi. Þess ber einnig að geta að engin lagadeild, sem vill láta taka sig alvarlega, getur sleppt því að kenna réttarheimildarfræði, lögskýringar, kröfurétt, skaðabótarétt, refsirétt og réttarfar. Lögrétta hvetur því til þess að grein þessi verði óbreytt.


Um 5. gr.  
Engin athugasemd við grein þessa.

Um 6. gr.  
Við leggjum til að greininni verði breytt og hljóði svo: „Lög þessi öðlast þegar gildi.“ Engin ástæða er fyrir því að vera að draga framkvæmdina frekar á langinn.

Virðingarfyllt,



Jón Kristinn Sverrisson, formaður Lögréttu, félags  
laganema við Háskólann í Reykjavík.



Andri Gunnarsson, formaður ritnefndar.